

STJÓRNARTÍÐINDI B 72 – 1997

Nr. 526

1174

20. júní 1997

REGLUGERÐ

fyrir Eftirlaunasjóð slökkviliðsmanna á Keflavíkurflugvelli.

1. gr.

Nafn sjóðsins og heimili.

Sjóðurinn heitir Eftirlaunasjóður slökkviliðsmanna á Keflavíkurflugvelli. Heimili hans og varnarþing er í Keflavík.

2. gr.

Hlutverk sjóðsins.

Hlutverk sjóðsins er að tryggja sjóðfélögum, eftirlifandi mökum þeirra og börnum lífeyri eftir þeim reglum, sem hér fara á eftir.

3. gr.

Sjóðfélagar.

Sjóðfélagar skulu vera allir þeir starfsmenn Slökkviliðsins á Keflavíkurflugvelli, sem skýlt er samkvæmt ákvörðun kaupskrárnefndar frá 28. janúar 1987 að greiða iðgjöld til sjóðsins í samræmi við ákvæði 8. gr.

Ellí- og örorkulífeyrisþegar sjóðsins teljast sjóðfélagar, nema um sé að ræða lífeyri samkvæmt 2. málsg. 14. gr.

4. gr.

Stjórn sjóðsins.

Stjórn sjóðsins skipa þrír menn, formaður, ritari og gjaldkeri. Stjórnin skiptir með sér verkum. Stjórn FSKF skipar menn í stjórn sjóðsins.

Kjörtímabil stjórnarmanna skal vera 3 ár og skal einn þeirra ganga úr stjórninni ár hvert. Heimilt er að kjósa og skipa sama mann tvisvar sinnum í röð, þannig að viðkomandi sitji 6 ár í stjórn samfellt, en þá skal nýr maður taka sæti í stjórn.

Við kosningu og skipan í stjórn sjóðsins gilda eftirfarandi reglur:

1. Stjórn sjóðsins tilnefni 3 menn úr röðum sjóðfélaga, að vandlega athuguðu máli. Gætt skal að því að viðkomandi hafi á sér gott orð varðandi fjármál.
2. Að fenginni tilnefningu skal stjórn FSKF velja einn af þeim sem tilnefndir eru og skipa í stjórn sjóðsins til 3ja ára.
3. Gefi stjórnarmaður, er aðeins hefir setið 3 ár í stjórn, kost á sér til áframhaldandi stjórnarsetu, skal hann að öllu jöfnu tilnefndur til næstu 3ja ára.

Stjórn sjóðsins skal halda gerðabók og skrá í hana allar samþykktir sínar, svo og öll þýðingarmikil mál, er rædd kunna að vera á fundum.

Til þess að samþykkt sé lögmæt, þurfa tveir stjórnarmanna að greiða henni atkvæði.

Stjórnin gegnir þagnarskyldu varðandi upplýsingar er fram koma í lánsúmsóknum sjóðfélaga.

5. gr.

Reikningar og endurskoðun.

Reikningar sjóðsins skulu miðast við almanaksárið. Stjórn sjóðsins skal ráða löggiltan endurskoðanda til að endurskoða reikningana, en Félag slökkviliðsmanna á Keflavíkurflugvelli kys á aðalfundi félagsins tvo endurskoðendur úr hópi félagsmanna til eins árs í senn.

6. gr.

Ávöxtun fjár sjóðsins.

Stjórn sjóðsins sér um ávöxtun á fé hans og skal það gert á eftirfarandi hátt:

1. Í skuldabréfum tryggðum með veði í húseignum, allt að 50% af brunabótamatsverði, eða sé brunabótamat ekki fyrir hendi, þá af matsverði, sem ákveðið er af tveimur mönnum, er fjármálaráðherra tilnefdir.
2. Í bönkum og sparisjóðum.
3. Í ríkisskuldabréfum eða skuldabréfum tryggðum með ábyrgð ríkissjóðs.
4. Í skuldabréfum með fullri bankaábyrgð.
5. Í skuldabréfum stofnlánasjóða atvinnuveganna, fjárfestingarstofnana eða annarra lána-stofnana en getið er hér að framan, enda starfi þær samkvæmt sérstökum lögum eða séu undir eftirliti bankaeftirlits Seðlabanka Íslands.
6. Í skuldabréfum sveitarfélaga, enda sé fjárhagur hlutaðeigandi sveitarfélags að mati sjóðstjórnar traustur, þegar hliðsjón er höfð af skuldastöðu þess, ábyrgðarskuldbindingum og árlegum tekjum.
7. Í hlutabréfum í fyrirtækjum, sem hafa skráð kaup- og sölugengi á markaði hjá a.m.k. tveimur verðbréfafyrirtækjum, sem aðild eiga að Verðbréfabíngi Íslands. Þó skal eigi verja meiru en 7% af árlegu ráðstöfunarfé sjóðsins til hlutafjárkaupa. Árleg hlutabréfakaup samkvæmt þessum lið teljast einvörðungu kaup umfram sölu á hlutabréfum. Eftirlaunasjóðnum skal eigi heimilt að eiga meira en 5% af hlutafé í hverju fyrirtæki. Heildarhlutabréfaeign sjóðsins samkvæmt þessum lið skal á hverjum tíma ekki vera meiri en sem nemur 10% af hreinni eign sjóðsins til greiðslu lífeyris.
8. Í traustum erlendum skuldabréfum og hlutabréfum, sem skráð eru á opinberum verðbréfamörkuðum í aðildarríkjum Efnahags- og framfarastofnunar Evrópu (OECD). Hlutfall erlendra eigna fari þó ekki umfram 10% af hreinni eign til greiðslu lífeyris, og skal stjórn sjóðsins gæta eðlilegrar áhættudreifingar í því sambandi.

Heimild til kaupa á verðbréfum samkvæmt 6.-8. lið er bundin því skilyrði, að um slík kaup sé fullt samkomulag í stjórn sjóðsins.

7. gr.

Tryggingafræðileg athugun.

Fimmta hvert ár skal stjórn sjóðsins fá tryggingafræðing til að reikna út fjárhag sjóðsins. Hann skal semja skýrslu um athugunina og gera upp fjárhag sjóðsins á grundvelli hennar. Sýni uppgjörið halla, sem ekki verður jafnaður með því að auka tekjur sjóðsins, ber að lækka lífeyrisréttindin hlutfallslega.

8. gr.

Iðgjöld.

Sjóðfélagar greiði í iðgjöld til sjóðsins 4% af launum þeim, er þeir taka hjá slökkviliðinu og gjaldskyld eru samkvæmt gildandi kjörum á hverjum tíma, en launagreiðandi greiðir 6% af sömu launum.

Auk iðgjalda samkvæmt 1. málsg. skulu sjóðfélagar greiða til sjóðsins sérstakt viðbótar-gjald, er nemi 2% af gjaldstofni, sem þar greinir, en launagreiðandi greiði 6%.

Sjóðfélagar bera ekki ábyrgð á skuldbindingum sjóðsins með öðru en iðgjöldum sínum.

Launagreiðanda ber að halda eftir af launum sjóðfélaga iðgjaldshluta þeirra og standa sjóðnum skil á honum ásamt eigin iðgjaldshluta eigi síðar en 14 dögum eftir útborgun launanna.

9. gr.

Grundvöllur lífeyrisréttinda.

Samanlögð iðgjöld sjóðfélaga hvert almanaksár skulu umreiknuð í stig, er mynda grundvöll lífeyrisréttinda hans.

Til grundvallar stigaútreikningi skulu reiknuð sérstök grundvallarlaun. Frá 1. janúar 1987 skulu grundvallarlaun vera kr. 26.557 á mánuði miðað við þáverandi kauplag. Sjóðstjórn ákveður, að fenginni umsögn Kjararannsóknarnefndar, breytingar á grundvallarlaunum þessum í samræmi við breytingar á launum verkamanna samkvæmt kjarasamningum. Verði grundvöllur þessi að dómi sjóðstjórnar ónothæfur mælikvarði á breytingar á dagvinnutekjum sjóðfélaga almennt, skal hún ákveða annan stigagrundvöll, svo og tengingu hans við fyrri grundvöll. Sama gildir, ef stigagrundvöllur sem ákveðinn hefur verið af sjóðstjórn, reynist síðar ónothæfur.

Stig ársins reiknast þannig að deilt skal í 10-föld iðgjöld, sem greidd hafa verið vegna hlutaðeigandi sjóðfélaga samkvæmt 1. málsg. 8. gr., með grundvallarlaunum ársins samkvæmt 2. málsg. Iðgjöld samkvæmt 2. málsg. 8. gr. reiknast ekki til stiga.

Stig skulu reiknuð með þremur aukastöfum.

10. gr.

Ellilífeyrir.

Hver sjóðfélagi sem orðinn er fullra 65 ára að aldri og hefur látið af stöðu sinni hjá slökkviliðinu, á rétt á ellilífeyri úr sjóðnum.

Upphæð ellilífeyris er hundraðshluti af grundvallarlaunum eins og þau eru 1. hvers mánaðar, sem lífeyrir er greiddur, og nemur hundraðshluti þessi samanlögðum stigafjölda, sem sjóðfélaginn hefur áunnið sér, margfölduðum með 1,7.

Nú er samanlagður lífaldur sjóðfélaga og viðurkenndur starfsaldur hans hjá Slökkviliðinu á Keflavíkurflugvelli orðinn 95 ár eða meira, áður en hann nær 65 ára aldri, og er honum þá heimilt að láta af stöðu sinni og hefja töku ellilífeyris, enda hafi hann náð 60 ára aldri. Fjárhæð lífeyris reiknast þá í samræmi við 2. málsg. með þeirri breytingu, að við 95 ára markið skal einungis reikna stig þeirra 32 ára, sem hagstæðust eru fyrir sjóðfélagann. Önnur stig sem sjóðfélaginn hefur áunnið sér, er hann lætur af störfum, reiknast í hlutfallinu milli tímans frá 95 ára markinu til þess tíma, er hann hefur töku lífeyris, og tímans frá 95 ára markinu til 65 ára aldurs. Hefji hann ekki töku lífeyris fyrr en eftir 65 ára aldur, reiknast lífeyrir eftir 2. og 4. málsg.

Heimilt er sjóðfélagi að fresta töku ellilífeyris allt til 75 ára aldurs, og hækkar þá upphæð ellilífeyris vegna réttinda, sem áunnin voru fram til 65 ára aldurs, um 0,5% fyrir hvern mánuð, sem töku lífeyris er frestað.

11. gr.

Örorkulífeyrir.

Hver sjóðfélagi, sem greitt hefur iðgjöld til sjóðsins undanfarin þrjú almanaksár og a.m.k. 6 mánuði á undanfarandi 12 mánuðum, á rétt á örorkulífeyri, ef hann verður fyrir orkutapi, er tryggingayfirlæknir metur 40% eða meira. Örorkumat þetta skal fyrstu þrjú árin eftir orkutapið aðallega miðað við vanhæfni sjóðfélaga til að gegna starfi því, er hann hefur gegnt og aðild hans að sjóðnum er tengd. Þrátt fyrir örorku á enginn rétt á örorkulífeyri, meðan hann heldur fullum launum fyrir starf það er hann gegndi, eða fær jafnhá laun fyrir annað starf, og aldrei skal samanlagður örorkulífeyrir og barnalífeyrir samkvæmt 3. málsg. 13. gr. vera hærri en sem nemur þeim tekjumissi, sem sjóðfélaginn hefur sannanlega orðið fyrir sökum örorkunnar.

Hámark örorkulífeyris miðast við áunninn lífeyrisrétt samkvæmt 10. gr. að viðbættum lífeyri er svarar til þess stigafjölda sem sjóðfélaginn hefði áunnið sér fram til 65 ára aldurs miðað við meðaltal stiga hans næstu þrjú almanaksárin fyrir orkutapið. Telji sjóðstjórn þetta þriggja ára meðaltal vera sjóðfélaganum óhagstætt vegna sjúkdómsforfalla, er henni heimilt að leggja til grundvallar meðaltal stiga fleiri ár eftur í tímann og sleppa úr meðaltalinu því almanaðsári, sem lakast er. Eigi sjóðfélaginn jafnframt rétt á örorkulífeyri úr öðrum sjóði, skal hann því aðeins fá lífeyri úr þessum sjóði vegna ókomins tíma, að hann hafi síðast greitt iðgjöld til þessa sjóðs. Ef rekja má orkutapið til ofnotkunar áfengis, deyfi- eða fíknilyfja, skal ekki reikna réttindi vegna ókomins tíma.

Örorkulífeyrir er sami hundraðshluti af hámarks örorkulífeyri og orkutapið er metið, sbr. þó 1. málsg.

Skylt er öryrkja, sem sækir um örorkulífeyri úr sjóðnum eða nýtur slíks lífeyris, að láta stjórn sjóðsins í té allar þær upplýsingar um heilsufar sitt og atvinnutekjur, sem nauðsynlegar eru til að dæma um rétt hans til lífeyris.

Stjórn sjóðsins skal lækka eða fella niður örorkulífeyri þeirra öryrkja, sem fá starfsorku sína aftur að nokkru eða öllu leyti. Sömu leiðis ber henni að hækka örorkulífeyrinn, ef örorkan vex til muna og án sjálfskaparvita frá því sem hún var metin við fyrri ákvarðanir, enda hafi sjóðfélaginn á þeim tíma er örorka óx, ekki verið í starfi er veitti honum lífeyrisréttindi í öðrum lífeyrissjóði.

Örorkulífeyrir fellur niður við 65 ára aldur. Ellilífeyrir skal þá ákveðinn þannig, að auk áunninna stiga skal reikna að þeim hluta, er hundraðshluti örorku segir til um, stig sem við úrskurðun örorkulífeyris voru reiknuð sjóðfélaganum fram til 65 ára aldurs. Aldrei skal þó slík viðbót við áunnin stig verða meiri en svo, að heildarstigafjöldi hvert almanaksár verði hærri en sjóðfélagi hefði náð fyrir fullt starf.

12. gr.

Makalífeyrir.

Nú andast sjóðfélagi, sem naut elli- eða örorkulífeyris úr sjóðnum eða greitt hafði iðgjald til hans a.m.k. 6 mánuði á undanfarandi 12 mánuðum og lætur eftir sig maka, og á þá hinn eftirlifandi maki rétt á lífeyri úr sjóðnum, enda sé hann orðinn 40 ára að aldri við fráfall sjóðfélagsins og hjónabandið hafi staðið a.m.k. 5 ár og verið stofnað áður en sjóðfélaginn náði 60 ára aldri.

Andist sjóðfélagi, sem uppfyllir skilyrði 1. málsg. um iðgjaldagreiðslutíma, en maki hans fær ekki úrskurðaðan makalífeyri samkvæmt þeirri málsgrein eða einungis skertan makalífeyri, sbr. 5. málsg., og skal óskertur makalífeyrir þá eigi að síður greiddur í 24 mánuði eftir fráfall sjóðfélagsins. Láti sjóðfélagi eftir sig barn innan 18 ára aldurs, sem hann hefur átt með eftirlifandi maka sínum, skal óskertur makalífeyrir veittur til 18 ára aldurs barnsins án tillits til hjúskapartíma og aldurs sjóðfélaga og maka hans. Kjörbarn þeirra veitir sama rétt, enda hafi ættleiðing átt sér stað fyrir 60 ára aldur sjóðfélagsins, áður en hann missti starfsorku sína og a.m.k. einu ári áður en hann lést.

Nú lætur sjóðfélagi ekki eftir sig maka, en einstæð móðir hans, ógift systir eða annar ógiftur einstaklingur hefur sannanlega annast heimili hans um árabíl fyrir andlát hans, og er þá stjórn sjóðsins heimilt að greiða hlutaðeigandi makalífeyri, svo sem um ekkju eða ekkil væri að ræða. Á sama hátt er sjóðstjórn heimilt að greiða sambúðarmanni eða sambúðarkonu lífeyri. Þá er sjóðstjórn heimilt að greiða makalífeyri að hluta eða að fullu að þeim tíma loknum, sem tiltekinn er í 2. málsg., ef tryggingayfirlæknir telur hinn eftirlifandi maka vanta 50% eða meira á fulla starfsorku.

Upphæð óskerts makalífeyris er hundraðshluti af grundvallarlaunum eins og þau eru í hvers mánaðar, sem lífeyrir er greiddur, og nemur hundraðshluti þessi samanlögðum stiga-

fjölda, sem sjóðfélaganum er reiknaður. Auk áunninna stiga skal telja með þau stig, sem ætla má að sjóðfélaginn hefði áunnið sér fram til 65 ára aldurs, reiknuð í samræmi við ákvæði 2. málsg. 11. gr., en þó skal aldrei miða meðaltal stiga við fleiri almanaksár en þau, sem sjóðfélaginn hefur greitt iðgjöld. Hafi sjóðfélaginn notið örorkulífeyris úr sjóðnum, skal reikna stig frá þeim tíma er honum var veittur örorkulífeyrir, og til þess tíma er makalífeyrir er veittur, í samræmi við ákvæði 6. málsg. 11. gr., en síðan til 65 ára aldurs í samræmi við stig þau, sem lögð voru til grundvallar örorkulífeyri. Veiti dauðsfallið hinum eftirlifandi maka jafnframt rétt til lífeyris úr öðrum sjóði, skal hann því aðeins fá lífeyri úr þessum sjóði vegna ókomins tíma, að hann hafi síðast greitt iðgjöld til þessa sjóðs.

Fjárhæð samkvæmt 4. málsg. skerðist um 9% fyrir hvert ár eða brot úr ári, sem á vantar, að makalífeyrisþeginn hafi náð 50 ára aldri við fráfall sjóðfélagsans.

Maki samkvæmt þessari grein telst ekki sá, sem skilinn var við sjóðfélagann að borði og sæng fyrir andlát hans. Réttur til makalífeyris fellur niður ef makalífeyrisþeginn gengur í hjónaband eða tekur upp óvígða sambúð, en gengur aftur í gildi, ef hjúskapnum eða sambúðinni er slitið án réttar til lífeyris.

13. gr.

Barnalífeyrir.

Nú andast sjóðfélagi, sem greitt hefur iðgjöld til sjóðsins eða notið úr honum örorkulífeyris a.m.k. 6 mánuði á undanfarandi 12 mánuðum, og eiga þá börn hans og kjörbörn, er hann lætur eftir sig og yngri eru en 18 ára, rétt á lífeyri úr sjóðnum til 18 ára aldurs. Veiti fráfall sjóðfélagsans börnunum jafnframt rétt til lífeyris úr öðrum lífeyrissjóði, skal lífeyrir úr þessum sjóði þó bundinn því skilyrði, að sjóðfélaginn hafi síðast greitt iðgjöld til þessa sjóðs.

Ef barnið á foreldri eða kjörforeldri á lífi, er sér um framfærslu þess, er samannlagður lífeyrir þess frá almannatryggingum og lífeyrir úr þessum sjóði 50% hærri en barnalífeyrir almannatrygginga. Að öðrum kosti er hinn samannlagði lífeyrir tvöfaldur barnalífeyrir almannatrygginga, en þó skal lífeyrir úr sjóðnum í slíku tilviki aldrei vera lægri en verða mundi, ef foreldri eða kjörforeldri sæi um framfærslu barnsins.

Sama rétt öðlast börn og kjörbörn þeirra sjóðfélaga, er njóta örorkulífeyris úr sjóðnum vegna 100% örorku. Við ákvörðun lífeyrisfjárhæðar sjóðsins skal þó ávallt reikna með að örorka samkvæmt almannatryggingalögum sé einnig 100%. Sé örorka samkvæmt 11. gr. metin lægri en 100%, skal barnalífeyrir sjóðsins vera hlutfallslega lægri.

Fósturbörn og stjúpbörn, sem sjóðfélagi hefur framfært að mestu eða öllu leyti, skulu eiga rétt á barnalífeyri. Skulu lífeyrisgreiðslur sjóðsins vegna slíkra barna vera hinar sömu og vera mundu, ef um börn eða kjörbörn væri að ræða.

Nú andast sjóðfélagi án þess að til greiðslu makalífeyris samkvæmt 12. gr. komi, og eiga þá börn hans undir 18 ára aldri rétt á aukabótum, er samsvara óskertum makalífeyri í 2 ár, auk venjulegra bóta. Bótaupphæðin, einfaldur makalífeyrir, skiptist á milli eftirlifandi barna, séu þau fleiri en eitt.

14. gr.

Iðgjaldagreiðslur falla niður.

Nú falla niður launagreiðslur til sjóðfélaga vegna veikinda, og ávinnur hann sér ekki réttindi meðan svo stendur. Tímabil er iðgjaldagreiðslur hafa sannanlega fallið niður af þessari ástæðu, reiknast ekki með þegar úrskurða skal, hvort skilyrði um iðgjaldagreiðslutíma eru uppfyllt.

Falli iðgjaldagreiðslur niður í meira en 6 mánuði samfleytt af öðrum ástæðum en veikindum, telst hlutaðeigandi ekki lengur til sjóðfélaga. Skulu þá áunnin stig geymd. Réttur til

elli-, örorku- og makalífeyris fellur ekki niður þótt sjóðfélaginn hverfi úr sjóðnum, en miðast einungis við áunnin geymd stig. Ellilífeyrir reiknast þá í samræmi við 2. og 4. málsg. 10. gr.

15. gr.

Flutningur réttinda.

Gerist sjóðfélagi, sem fer úr þessum lífeyrissjóði, sjóðfélagi í öðrum lífeyrissjóði sem stofnaður er með lögum eða nýtur viðurkenningar fjármálaráðuneytisins, er stjórn sjóðsins heimilt að endurgreiða með vöxtum öll iðgjöld samkvæmt 1. málsg. 8. gr., sem greidd hafa verið í sjóðinn hans vegna, ásamt iðgjöldum sem áður hafa verið flutt til sjóðsins. Það er skilyrði fyrir endurgreiðslunni, að hún gangi til kaupa á lífeyrisréttindum fyrir viðkomandi mann í þeim sjóði, sem hann flyst til, og aldrei má endurgreiða hærri upphæð en þarf til að kaupa réttindi í þeim sjóði, er svari til þess starfstíma, sem sjóðfélaginn átti að baki.

16. gr.

Samningur um gagnkvæm réttindi o.fl.

Heimilt er stjórn sjóðsins að gera samninga við aðra lífeyrissjóði um tilhögun réttinda-flutnings o.fl. Í slíkum samningum má víkja frá biðtíma- og bótaákvæðum reglugerðar þessarar í því skyni að koma í veg fyrir niðurfall réttinda, þegar sjóðfélagi skiptir um starf og tvítryggingu réttinda, sem ekki miðast við liðinn iðgjaldagreiðslutíma. Ennfremur er þar heimilt að ákveða að sjálfstæð réttindi í einstökum sjóðum skuli samanlagt ekki vera meiri en heildarréttindin mundu verða hjá einum og sama sjóði. Aldrei skal flytja frá sjóðnum iðgjöld samkvæmt 2. málsg. 8. gr.

17. gr.

Tilhögun lífeyrisgreiðslna.

Lífeyrir greiðist mánaðarlega frá næstu mánaðamótum eftir að réttur til lífeyris er fenginn, til loka þess mánaðar, er réttur til lífeyris fellur úr gildi. Aldrei skal þó sjóðstjórn skylt að úrskurða lífeyri lengra aftur í tímann en tvö ár, reiknuð frá byrjun þessa mánaðar, er umsókn berst sjóðnum.

Sé lífeyris ekki vitjað í fimm ár, getur stjórn sjóðsins úrskurðað að réttur til greiðslu falli niður, og rennur þá upphæðin aftur til sjóðsins.

18. gr.

Bann við framsali og veðsetningu lífeyris.

Réttinn til lífeyris má hvorki láta af hendi né veðsetja.

19. gr.

Gerðardómur.

Vilji rétthafi lífeyris ekki una úrskurði sjóðstjórnar í máli er hann hefur skotið til hennar, getur hann vísað því til gerðardóms, sem skipaður skal þremur mönnum, einum tilnefndum af gerðarbeiðanda, einum tilnefndum af sjóðstjórn og oddamanni tilnefndum af sýslumanninum í Keflavík.

20. gr.

Réttindi vegna starfa til febrúarloka 1987.

Þeir sjóðfélagar samkvæmt 3. gr., sem voru í starfi hjá slökkviliðinu á Keflavíkurflugvelli 1. mars 1987, skulu eiga þess kost að flytja til eftirlaunasjóðsins inneign sína í Lífeyrissjóði slökkviliðsmanna á Keflavíkurflugvelli, enda tilkynni þeir stjórn sjóðsins skriflega þá ósk sína eigi síðar en 31. mars 1988.

Nú hefur inneign í lífeyrissjóðnum verið flutt til eftirlaunasjóðsins, og skal þá reikna sjóðfélaga stig vegna iðgjaldagreiðslna hans til fyrrnefnda sjóðsins miðað við grundvallarlaun samkvæmt lögum nr. 63/1971 og lögum nr. 2/1985, eins og þau grundvallarlaun hafa verið hvert almanaksár. Þá skal sjóðstjórn úrskurða sjóðfélaga stig vegna viðurkennds starfstíma hjá slökkviliðinu fram til marsloka 1968. Fyrir starf sem slökkviliðsmaður skal þá reikna 3 stig á ári, en að öðru leyti skal sjóðstjórn eftir því sem við verður komið, hafa hliðsjón af launum einstakra sjóðfélaga á þeim tíma sem um ræðir.

Hafi iðgjöld verið flutt til lífeyrissjóðsins frá öðrum lífeyrissjóðum, skal reikna hina fluttu fjárhæð til stiga, eins og um væri að ræða iðgjöld flutningsárs. Slík stig skulu ekki veita rétt til ellilífeyris fyrr en frá 65 ára aldri.

Þeir sjóðfélagar lífeyrissjóðsins sem nutu úr honum örorkulífeyris í desember 1987, skulu halda þeim lífeyri óbreyttum til 65 ára aldurs. Flytji þeir inneign sína með sama hætti og starfandi sjóðfélagar, sbr. 1. málsg., fer um rétt þeirra til ellilífeyris og við fráfali eftir 2. málsg. 14. gr. Reiknast stig þeirra eftir iðgjaldagreiðslum og réttindatíma fram til marsloka 1968, sbr. 2. málsg. Stig til marsloka 1968 skulu þó miðast við meðaltal stiga frá árinu 1969 til loka næsta árs áður en hlutaðeigandi missti starfsorku sína.

Sjóðfélagi lífeyrissjóðsins, sem fengið hefur úrskurð um rétt til örorkulífeyris, en naut ekki lífeyris í desember 1987, skal fá iðgjöld sín og eldri réttindatíma reiknuð til stiga og eiga rétt í samræmi við ákvæði 2. málsg. 14. gr.

21. gr.

Eignir lífeyrissjóðsins.

Auk inneigna, sem fluttar eru í samræmi við ákvæði 20. gr., skulu eignir örorkudeildar lífeyrissjóðsins renna til eftirlaunasjóðsins. Öðrum inneignum skal haldið á sérreikningum með sama hætti og áður. Skulu þær vera í vörslu eftirlaunasjóðsins og fá reiknaðar vaxta-tekjur og verðbætur í beinu hlutfalli við eign, en um greiðslur til rétthafa eða flutning til annarra lífeyrissjóða fer eftir ákvæðum reglugerðar lífeyrissjóðsins.

22. gr.

Breytingar á reglugerðinni.

Breytingar á reglugerð þessari eru því aðeins lögmætar, að þær hafi verið samþykktar á aðalfundi Félags slökkviliðsmanna á Keflavíkurlflugvelli og hlotið staðfestingu fjármálaráðuneytisins að fenginni umsögn kaupskrárnefndar utanríkisráðuneytisins og varnarmálanefndar.

Gildistaka.

Reglugerð þessi gildir frá 1. júlí 1997.

Reglugerð þessi var upphaflega samþykkt á aðalfundi Félags slökkviliðsmanna á Keflavíkurlflugvelli þann 29. febrúar 1988 en tók gildi 1. mars 1987.

Breytingar á reglugerðinni voru samþykktar á framhaldsaðalfundi Félags slökkviliðsmanna á Keflavíkurlflugvelli, þann 24. apríl 1994 og aftur á tveim félagsfundum í maí 1997.

Með tilvísun til laga nr. 55/1980 staðfestist reglugerð þessi hér með.

Fjármálaráðuneytinu, 20. júní 1997.

F. h. r.

Áslaug Guðjónsdóttir.

Hermann Jónasson.